

A S'AMIGU CARU EUGENIU UNALI

In su dulce zeffiru
de s'abrile ridente
chi oe hamus a prima saludadu
ti mando su suspiru
de custu coro ardente
chi palpitat pro te frad'istimadu.
Daghi t'est a presenza
fagheli una gentile accoglientzia

Narali: *"Ite recreu
ch'est a m'esser bennidu
unu suspiru 'e s'amigu lontanu".*
T'hat a narrere: *"Mereu
est vivende affligidu
ca non ti podet istringher sa manu,
ma cunservat in coro
de affettu pro te unu tesoro"*

A su fervidu basu
chi retzis dae mè
pro rinnovare s'antiga amistade
apostolu 'e Tomasu
non ti mustres ma crè
a tant'istima sintzera o caru frade
e faghe sa manera
chi de te prestu tenza una littera.

Non fettas mancu casu
de custu mutu avaru
indignu de sas fizas d'Elicona.
Iscas, in su Parnasu
s'est siccadu su laru
cando mi fin ponzende sa corona.
Dae cussu istampadu
in su timbru est: *"Poeta istemperadu".*

Osilo primo aprile 1897